



XUNTA DE GALICIA

CONSELLERÍA DE
CULTURA E TURISMO
Turismo de Galicia



CONVENIO DE COLABORACIÓN ENTRE A AXENCIA TURISMO DE GALICIA E O CONCELLO DE XUNQUEIRA DE ESPADANEDO PARA O PROXECTO DE MELLORA DE ACCESO AO MOSTEIRO DE SANTA MARÍA.

MEMORIA XUSTIFICATIVA

A xerente de Turismo de Galicia

DECLARA:

Que esta Axencia Turismo de Galicia formalizou co concello de Xunqueira de Espadañedo o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2019.

Que o instrumento convencional ten por obxecto establecer o marco de colaboración entre Axencia Turismo de Galicia e o concello de Xunqueira de Espadañedo para o proxecto de mellora de acceso ao Mosteiro de Santa María.

Que existe converxencia de intereses entre as entidades asinantes en orden á consecución obxecto referido.

Que o instrumento convencional que se pretende asinar se **fundamenta** no seguinte:

Primeiro.- A Axencia Turismo de Galicia, segundo o Decreto 196/2012, do 27 de setembro, polo que se crea a Axencia de Turismo de Galicia e se aproban os seus estatutos, é a entidade pública instrumental da Comunidade Autónoma de Galicia á que lle corresponde o exercicio, entre outras, das competencias en materia de coordinación, impulso, xestión e execución das actividades de promoción do turismo, e para lograr esta finalidade a Axencia Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.





Segundo.- Os concellos, segundo se sinala no artigo 25.2.h) da Lei 7/1985, do 2 de abril, reguladora das bases de réxime local, posto en relación coa Lei 7/2011, do 27 de outubro, do turismo de Galicia, teñen competencias en materia de turismo, en concreto a “información e promoción da actividade turística de interese e ámbito local”.

Terceiro.- Ao abeiro do disposto na Lei 5/1997, do 22 de xullo, de Administración local de Galicia, a Xunta de Galicia e as entidades locais poderán celebrar convenios de colaboración entre si para a máis eficaz xestión e prestación de servizos da súa competencia, podendo coordinar as súas políticas de fomento dirixidas a un mesmo sector, executar puntualmente obras ou servizos e adoptar as medidas oportunas para acadar calquera outra finalidade de contido análogo.

Cuarto.- Desde o Concello de Xunqueira de Espadañedo vense realizando dende hai tempo unha intensa labor de promoción do turismo rural e da vida nun concello de carácter eminentemente rural, aproveitando os valores dos que dispón o concello, así como mediante a realización de todo tipo de actividades culturais, deportivas, sociais e lúdicas.

O principal referente arquitectónico, turístico e cultural do concello atópase no Mosteiro de Santa María de Xunqueira de Espadañedo, declarado Ben de Interese Cultural. Fundado no ano 1.150 baixo a observancia de Santo Agustín para posteriormente unirse á Orde do Cister no ano 1.170. De estilo eminentemente románico, consta dunha igrexa de tres corpos, así coma dun claustro de dúas plantas.

Actualmente concéntrase neste inmobile un importante foco, xa que alí se desenvolven múltiples actividades de lecer, culturais e sociais. Dende a súa rehabilitación emprázase neste edificio as oficinas da Casa Consistorial, o velorio e a biblioteca municipais, sedes de varias asociacións así coma diversos salóns de usos múltiples.

Sito ao sur do mosteiro, atópase un espazo público a través do cal existen varios accesos ó mosteiro. Nesta parcela, carente de calquera tipo de pavimentos, os usos se superpoñen na actualidade de forma desordeada, misturando circulacións de tráfico rodado e peonil, empregándose como aparcadoiro improvisado de vehículos unha zona apegada ao mosteiro, o que desvirtúa a propia imaxe do monumento.

O tránsito peonil dos visitantes a través deste espazo non se realiza nas condicións máis axeitadas, debido á falla de pavimentos, á orografía irregular da parcela e á falla de orde das circulacións. Actualmente a parcela carece de calquera tratamento e non dispón de





itinerarios definidos nin adaptados ás necesidades, que ofrezan unha mínima seguridade, resultando de difícil accesibilidade.

Dende a Av/ de Xunqueira de Espadañedo, existe unha escaleira ubicada entre dous muros de contención de cachotería, que dá acceso á parcela dende a vía principal do núcleo. Dita escaleira atópase actualmente sen rematar e nun estado deficiente, cunha superficie irregular, realizada con chanzos de morteiro de cemento, recheo de pedras e ata de cachos de ladrillos. Ademais, debido ás dimensións dos chanzos da escaleira, excesivamente tendida, resulta moi dificultoso o seu tránsito, xa que se atopan descompensados para unhas zancadas normais, sobre todo para as persoas maiores. Carece ademais de calquera tipo de varanda.

Os accesos principais ó mosteiro, carecen ademais dunha sinalización urbana axeitada, que indique con claridade para o visitante, os accesos tanto ao monumento como aos servizos municipais que nel se emprazan.

Dada a problemática exposta e a demanda existente, faise necesario a mellora deste espazo público, acondicionando de xeito adecuado esta parcela e os accesos ao Mosteiro. Pola súa proximidade ó edificio, a actuación proposta neste entorno pretende ser en todo momento respectuosa co mesmo, debéndose integrar neste entorno de grande valor arquitectónico, evitando impactos significativos sobre o mesmo.

Dado que se trata dun concello de carácter eminentemente rural, procúrase constantemente a promoción dos valores turísticos do mesmo, mellorando as dotacións e servizos do concello, polo que esta actuación vai encamiñada á posta en valor do seu principal referente arquitectónico, así coma do seu entorno inmediato, mediante un tratamento superficial da parcela, para mellorar as condicións xerais de accesibilidade ao monumento. Do mesmo xeito, mellorarase a sinalización turística, mediante a instalación de sinais direccionais urbanas.

Quinto.- O Plan Estratéxico de Turismo de Galicia 2020 sinala como Reto 1, o aproveitamento do potencial dos recursos naturais de Galicia, que permiten construír un destino único e diferencial, artellado ó redor dunha Marca: Galicia. A sustentabilidade do destino será o fío condutor na construción das liñas estratéxicas que se contemplan:

- Paisaxe, recursos naturais e sustentabilidade.





- Valores diferenciadores e o seu potenciamento
- A mobilidade turística
- Os camiños de Santiago como dinamizadores do país

Así mesmo a Liña estratéxica 1: Paisaxe, recursos naturais e sostibilidade, sinala:

O turismo é un gran consumidor de espazos e de recursos naturais. O desenvolvemento da actividade require dunha planificación coherente e ordenada, que garanta a preservación dos espazos especialmente sensibles e a conservación da súa autenticidade e valores patrimoniais, tanto desde o punto de vista natural como desde o punto de vista cultural. A paisaxe como recurso estratéxico, debe de ser preservada e posta en valor desde un punto de vista turístico, garantindo a sostibilidade do espazo natural a medio e longo prazo.

Obxectivos estratéxicos:

1. Impulso ao uso turístico sostible da paisaxe. Ecoturismo
2. Recuperación e mantemento de núcleos singulares
3. Control de capacidade de carga e redistribución de fluxos turísticos
4. Sostibilidade das infraestruturas turísticas

Que a través deste convenio, outórgase ao concello de Xunqueira de Espadañedo unha subvención directa en virtude do disposto no artigo 19.4 c) da Lei 9/2007, do 13 de xuño, de Subvencións de Galicia, polas razóns de interese público, social, económico e humanitario expostas nos puntos anteriores e que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.





XUNTA DE GALICIA

CONSELLERÍA DE
CULTURA E TURISMO
Turismo de Galicia



En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria, en Santiago de Compostela

A xerente de Turismo de Galicia

M^a Elena Barca Ramos



Xacobeo 2021